

# KALATE OSU PAUL A NGA TILI BOTE YA KORENT

## Mebatan A Mvean Akéva

(Rôm 1 : 1-7 ; Yuda 1, 2 ; M.M. 18)

**1** 1 Ma Paul, nyô a a nga lobane nlômane Krist Yésus amu nkômbane Zambe, a Sôsten, mojañe wongan. 2 E be kirke Zambe é ne Korent, e be ba be nga teléban étyi e be Krist Yésus, mimfufub mi nga loban, a ba bese ya vôm ase b'aloene jôé Nti wongan Yésus Krist, éñwob a éñwongan. 3 Mvam é bo'ô e be mia a mvo'é é so'ô e be Zambe Tate wongan a e be Nti Yésus Krist.

4 M'ave Zambe wom akéva kom ése ajô denan, amu mvame Zambe é nga veban e be mia e be Krist Yésus 5 na, mi bo akum mezene mese e be nye, mfa'a ya nkobô ôse a ñyemane mam ôse ; 6 aval ane nkañetane Krist ô nga yeme ngu e be mia, 7 ane mi aye bo te jembane mvean éziñ ya nsisim, nté mi ayange nlitane Nti wongan Yésus Krist ; 8 nnye ate fe a ye yemete mia akekui asu'ulan, mi bo te bijô e Môs Nti wongan Yésus Krist. 9 Zambe a ne nyô ya buni, nnye a nga loene mia mfula'ane ya be Mone wé Yésus Krist Nti wongan.

## Minkandane Mengam E kirke Eté

10 Nde, a bobajañ, m'alebe mia amu jôé Nti wongan Yésus Krist na, mia bese mi kibô'ô tyiñe jia a na, minkandane mengam mi bo'ô te bo e be mia ; ve na, mi bo ôsimesane via a fe'e jia. 11 Amu, A bobajañ, bôte ya nda Klôé be kateya ma ajô denane na, mintañete mi ne e be mia. 12 Nde jam m'ajô e ne na, Môt ya be mia a jô na, Ma me ne môta a Paul, nge na, ma me ne môta Apôlos ; nge na, ma me ne môta Kéfas ; nge na, ma me ne môta Krist. 13 Ye Krist a salane mengab ? Ye Paul nnye a nga tyelébane e krôa amu ajô denan ? Nge na, ye mi nga baptizôban a jôé Paul ? 14 M'ave Zambe akéva ane me nga bo te baptizô môta éziñ ya be mia, ve Krispus baa Gaius étam ; 15 môta éziñ a za jô na, mi nga baptizôban a jôé dam. 16 Ve me nga baptizô fe bôt ya nda Stéfanas ; nde me ne te yem nge me nga baptizô môta mfe. 17 Amu Krist a nji lôme me na, me baptizô bôt, ve na, me kat mbamba foé ; sa a élene nkobô, krôa Krist é za bo momo jôm.

## Krist A Ne ngul A Fe'e Zambe

( Yér 9 : 23, 24 ; Mat 11 : 25-27 ; Luk 1 : 35 ; Rôm 1 : 16 ; 1 Kor 3 : 18-20)

18 Amu ajô krôa é ne akute jam e be ba b'ajañ ; ve mfa'a ya bia bi anyiiban, e ne ngule Zambe. 19 Amu e ne ntilane na,

“ M'aye jiane fe'e mimfefek, a tu'ulane ñyemane beyeme mam.”

Rev. Matthias MEYE

Secrétaire Général 1964

20 Mfefek ô ne vé ? Ntili bekalate a ne vé ? Nsôane bisô ya miaé wu a ne vé ? Ye Zambe a nji bo fe'e ya si nyô akute jam ? 21 Amu na, a fe'e Zambe, vôm si é nji ke yeme Zambe amu fek, Zambe a nga yen mvaé ya nyii ba b'abuni amu akute jam bi akate foé. 22 Amu Beyude b'ayete mendem, a Begrek b'ajeñe fek, 23 ve bia bi akañete Krist, ntyeléban e krôa. Mfa'a Beyude a ne ékolé ôbak, a mfa'a bikul a ne akute jam ; 24 ve mfa'a ba be ne nloen, Beyude a Begrek bebaane, Krist a ne ngule Zambe a fe'e Zambe. 25 Amu akute jam Zambe e ne fek a dañe bôt, a ate'e jam Zambe e ne ngul a dañe bôt.

26 Nde, a Bobejañ, mi tuka'a fomban nloene wônan na, mimfefek ya minsôn a ne mi né, mi nji bo été abui ; biwôlô bi bôt bi nji bo été abui ; benya bômva ya abialé be nji bo été abui. 27 Ve Zambe a nga tobe mekute me biôm ya si nyô na me ve mimfefek ôson ; a Zambe a nga tob mintete'e ya si nyô ne mi ve mingungul ôson ; 28 a Zambe a nga tob abubua bôt a zesé bôt ya si nyô ; ja'ana biôm bi ne momo, na a te'elan biôm bi né. 29 Nde ete , teke'e mô't ya minsôn a ye wumu émien asu Zambe. 30 Emien nnye a ne anjeñ ya ényiiñe jangan, e be Krist Yésus, nnye a nga bo fe'e jangan, zôsô wongan, mfubane wongan, a nkôtane wongan ; 31 ane e nga tilibane na,

“Nyô a bo ngunguan, a bo'o ngunguan e be Nti.”

### **Nkañetane Krist Ntyeleban E Krôa**

( 1 Kor 1 : 7-25 ; 2 Kor 4 : 5-7)

**2** 1 Ve ma, A bobajañ, éyoñ me nga kui e be mia, me nji zu a atyeñ nkobô, nge di ya fek, éyoñ me nga kate mia foé Zambe. 2 Amu me nga tyi'i na, m'aye bo te yem jam éziñ afe e be mia, vengevenge ve Krist Yésus, nyô a nga tyeléban e krôa. 3 Me nga too e be mia ate'e été, a woñ, a benyeñnyeñ abui ; 4 nkobô wom a nkatane foé wom, bi nji bo a mejô me ne fek, ma m'adutu bôt minlem, ve a nlitane Nsisim a ngu : 5 nde ete mbunane wônan w'aye bo te timbi a fe'e bôt, ve a ngul Zambe.

### **Nlitane Ya Nsime Zambe**

( Yôh 16 : 13-15 ; Ef 3 : 2-11 ; 1 Tés 5 : 21 ; 1 Yôh 2 : 20, 27)

6 Nde e fe'e, bi akobô je e be ba be ne benya bôtô, sa nyô ya miaé wu, nge nyô ya bivet ya miaé wu, mbie bi aye lô't. 7 Ve bi akobô fe'e Zambe, nyô é ne ndimba, a nyô é solô, nje Zambe a nga taté telé ôsusua ya biyoñ mfa'a ya дума dangan. 8 Bivete ya miaé wu, teke'e jia é nga yeme jame di ; amu nge bi too yeme de, ve bi nga bo te tyelé Nti ya étôtok e krôa. 9 Ve aval ane e nga tilibane na,

“ E jam dis e nga bo te yen, a alo teke'e wôk,

To'o nleme mô't teke'e yem, mam Zambe a nga kôm mfa'a ya ba b'anye'e nye.”

10 Mme Zambe a maneya liti bia amu Nsisim. Amu za a yeme mam me mô't, ve nsisim mô't ô too e be nye ? Nalé ate fe, teke'e mô't a yeme mam me Zambe, ve nsime Zambe. 12 Ve bia, bi nji nyoñe nsime ya si nyô, ve Nsisim w'aso e be Zambe, nde ete bi ne yeme mimveane Zambe a nga sôe e be bia. 13 Mam mete bi akobô, sa a mejô fe'e mô't

Rev. Matthias MEYE

Secrétaire Général 1961

j'aye'ele, ve ma Nsisim w'aye'ele, bi timi'i benya mejôô ya nsisim e be ba be bili Nsisim. 14 Môt a né ve ane a nga bialé a ne te nyoñe mam ya Nsime Zambe, amu me ne akut mfa'a wé, a nji bo ngul ya yeme me, amu m'alitiban a Nsisim. 15 Nde mô't a ne nyô ya Nsisim a yem mam mese, ve émien , teke'e mô't a yemelane nye. 16 "Amu za a yem nsimesane Nti, nalé a ye ye'ele nye ?" Be bia bi bili nsimesane Krist.

### **Beébe Bebobisaé Be Zambe**

( 1 Kor 1 : 11-15 ; 4 : 1-6 ; Behéb 5 : 11-14)

**3** 1 Ve ma, A bobajañ, me nji bo ngul ya kobô mia ane bôt be Nsisim, ve ane bôt minsôn, ane minkeñelé mi bon e be Krist. 2 Me nga toñe mia a menyañ, sa a benya bidii, amu éyoñ éte mi ngenane te bo ngu ; a ja'ana éyoñe ji mi ngenane te bo ngu ; 3 Amu mi ngenane bôte minsôn. Amu vôm mesengan a mitañete bi ne e be mia, ye mi nji bo bôte minsôn, a wulu aval ane bezesé be bôt ? 4 Amu éyoñ mô't éziñ a jô na, Ma me ne mô'ta Paul ; mfe ke na, Ma me ne mô'ta Apôlos, ye mi nji bo bezesé be bôt ? 5 Nde Apôlos a ne za ? Paul ke za ? ve bebobisaé, amu be mi nga buni aval ane Nti a nga ve mô't ase. 6 Ma me nga bé, Apôlos ke a nga sôé mendim ; ve Zambe nnye a nga yale. 7 nalé ate nyô a bé, nge nyô a sôé mendim, a se ke jôm, ve Zambe nyô a yale. 8 Nde fe na, nyô a bé, a nyô a sôé mendim, be ne jôme jia, ve mô't ase ya été a ye nyoñe ma'ane mé abim ane ésaé jé é né. 9 Amu bi ne beébe bebobisaé be Zambe. Mi ne afube Zambe, a nlôñane Zambe.

10 Aval ane mvame Zambe é nga veban e be ma, me nga bô'ô mbôka'a ane mfefe'e nlôñe menda, nde mô't mfe a lôñ été yôb. Ve mô't ase a tuka'a fombô ane a lôñ été yôb. 11 Amu teke'e mô't a ne ngul ya bô'ô mbôka'a mfe, ve wu ô mbôô, ñwô ô ne Yésus Krist. 12 Ve nge mô't a lôñ mbôka'a ôte yôb a gôlt, nge silba, nge bidima mekok, nge bilé, nge bilok, nge bikumba'a, 13 ésaé mô't ase j'aye litiban ne ngeëñ. Amu mô's w'aye kulane je, amu w'akuliban a nduan ; a nduan ébien j'aye ve'ele ésaé mô't ase a nga bo. 14 Nge ésaé mô't éziñ a nga lôñ été yôb j'aye tabe, éyoñ éte a ye nyoñe ma'an. 15 Nge ésaé mô't éziñ j'aye dik, a ye dimili, ve émien a ye nyiiban, ve aval ane nyô a tulan e nduan été. 16 Ye mi nji yeme na, mi ne tempela Zambe, a na, Nsime Zambe ô too e be mia ? 17 Nge mô't éziñ a ndaman tempela Zambe, Zambe a ye ndamane mô't ate ; amu tempela Zambe a ne étyi, a nnye ate mi né.

18 Mô't a bo'ô te du'u émien. Nge mô't éziñ ya be mia a simesane na, a ne fek e miaé wu, a bo'ô akut, nde ete a ye bo fek. 19 Amu fe'e ya si nyô é ne akute jam e be Zambe ; amu a ne ntilane na,

" A bi mimfefek e bilese biab été ;" 20 nalé fe na,

" Nti a yem minsimisane mimfefe'e na mi ne asuk." 21 Ajô ete nde mô't a bo'ô te bo ngunguan e be bôt, amu mam mese me ne émenan, 22 to Paul, nge Apôlos, nge Kéfas, nge si nyô, nge ényiñ, nge awu, nge mam me ne éyoñe ji, nge ma m'aye zu, mam mese me ne émenan, 23 mia mi ne ba be Krist, a Krist a ne nyôa Zambe.

**Esaé Minlôman**

( Rôm 14 : 10-12 ; 1 Kor 3 : 5-9)

Rev. Matthias MEYE  
Secrétaire Général 1961.....

**4** 1 Môt a lañe bia nalé, ane bebobisaaé be Krist, a beba'ale minsolane mi mam mi Zambe. 2 Nde d'asiliban e beba'ale na, be koé be ane ba ya buni. 3 Ve mfa'a wom, d'adañe tyôtyoé jame na, me tyi'iban ajô e be mia, nge e aba mejô bôt ; ve ja'ana nalé, me nji tyi'i ajô dam mamien. 4 Amu me ne te yeme jam e ne me ngame yat. Akôsabo nalé, me nji kale mamien amu éfia éte ; Nti nnye a tyi'i me ajô. 5 Nalé ate mi bo'ô te tyi'i jam éyoñ éyoñ é za kpwa'an akekui Nti a zu, nnye ate a ye kuli minsolane mi mam ya dibi, éfufub été, a liti fe mefe'e ya minlem éngengeñ été. Eyoñ éte éseka'a mô't j'aye so e be Zambe.

6 Nde, A bobajañ, me maneya ve'ane mam ma e be mamien a e be Apôlos amu ajô denan, nde ete mi ne ye'é e be bia ane mô't a yiane nyiñ ane mam me ne ntilan, a ane mô't éziñ ya be mia, a za bo nyô mbok mebun. 7 Amu za a fialé wo, a za jômô ô bili ? te ne ô nga nyoñe je ? Amu jé w'awumu womien aval ane nge é nji bo mvean ? Eté été mi nto ke njalan. 8 Eté été mi nto ke kum. Bia momo, mi nto ke bejôô ! Nge mi boya fo'ô bejôô, nde ete bia fe bi aye jôô bia be mia ! 9 Amu me lôô na, Zambe a litiya na bi bo minlôman mi asu'ulan, ane bôt b'ake wôéban, amu na bi nto jôm bivôé bôt b'abeme mis e si nyô, to beéngel a bôt. 10 Bi nto mekut amu ajô Krist, ve mia mi nto mimfefek e be Krist. Bi ne mintetek, ve mia mi ne mingungu. Mia mi bili ésemen, ve bia bi abiaséban. 11 Azukui awolo ebienne di bi awô'ô zaé a évé, bi ne soé, bi alumbane bikuta, a ndeñendeñ te mvôk, 12 bi awu ésaé, mboan ésaé a mo mangan mebien. Eyoñ b'akobô bia abé, bia bi abotan ; éyoñ b'akpwe'ele bia, bi ajibi ; 13 éyoñ b'aso'ô bia, bi abo ñbwa, bi nga boya, a bi nti éyoñe ji ane mbuane ya si nyô, komo'ô ya biôm bise.

14 Me nji tili mam ma ane me ne ve mia ôson, ve m'alebe mia ane bone bam m'anye'e. 15 Amu nge mi ne bi beye'ele te lañ e be Krist, ve mi nji bi beésa abui, amu me nga biaé mia e be Krist Yésus amu mbamba foé. 16 Amu ajô ete m'alebe mia na, bo'ane bevu bam. 17 Amu ajô ete me nga lôme mia Timôtéus, nnye a ne mone wom m'anye'e a nyô ya buni e be Nti. Nnye ate a ye beta ve mia ôsimesan ya mezene mam ya be Krist, aval ane m'aye'ele me vôm ase e kirke ése été. 18 Nde bevo'ô be ne mebun, aval ane me ngenane te zu e be mia ! 19 Ve me mbeme zu e be mia, nge Nti a kômbô ; nde m'aye yem, sa nkobô bôt mebun, ve ngule jab. 20 Amu éjôé Zambe é nji bo a nkobô, ve a ngu. 21 Jé mi akômbô ? Ye na, me zu e be mia a ôlé ? Ye na, a nye'an a nlem nje'eban ?

### **Tyi'an Ajô Bebo Mejian**

( Tim 1 : 19, 20)

**5** 1 Foé j'awô'ôtane fo'ô na mejian me ne e be mia, a na, aka'a mejian ete me nji bo ja'ana e be bikul été, ane mô't éziñ a ne kôme bi nga ésa. 2 Ve mia mi abo mebun, mi lí'i yi du, nde ete nyô a nga bo jam ete a ye vas e zañe jenan. 3 Amu vôm me ne momo a nyô, ve me too wôé a nsisim, aval ane nge me too me maneya tyi'i ajô ete nalé, 4 a jôé Nti Yésus mfa'a mô't a nga bo aka'a jam ete . Nde éyoñ mi sulaneya vôme wua, a nsisime wom ô too, a ngule Nti wongan Yésus, 5 mi kee Satan avale mô't ete mfa'a ya ndamane minsône mié, nde ete nsisime wé w'aye nyiiban e mô'se Nti Yésus. 6 Nwumane wônan ô nji bo mvaé. Ye mi nji yeme na, mone mvusu a vusu ngum amama'a ? 7 Va'ane nnôma mvusu, nde ete mi aye bo mfefé amama'a, amu mi ne teke'e mvusan. Amu Krist nyô a ne paska wongan a maneya tyi'iban. 8 Nalé ate, mba'ala'an ébe'e été, sa a nnôma mvusu, nalé fe sa a mvusu ya mbia nlem a mbia be mam, ve a fembé é ne te mvusan, nyô é ne mfuban a benya mejôô.

9 Me nga tili mia e kalate wom été na, mi bo te yeñ a beke mangan. 10 Sa ke beke mangan bese be ne si nyô, nge bôt be ne ndok, beze mimfaka, nge bekañe biyeñeyeña bi biôm ; ve nge nalé, éyoñ été mi ayiane kôlô e si nyô. 11 Ve me nga tili mia na, nge mô't éziñ a lobane na, monyañe wônan, a too nke mangan, nge ndôndok, nge nkañe biyeñeyeña bi biôm, nso'ô bôt, nso'ô bilam, nge ze mimfaka, mi bo'ane te di a nye mfula'ane. 12 Amu e ne za ajô été

na m'aye tyi'i ajô ya ba be ne atan ? Ye sa ba be ne kirke été mmbe mi ayiane tyi'i ajô ? 13 Zambe nnye a tyi'i mejô ya ba be ne atan. Va'ane mbia mô't ate e zañe jenan.

### **Bisomane Mejô Asu Bôt Be Ne Te Buni**

(Mat 5 : 38-41 , 23, 24 ; Rôm 12 : 17, 18 ; Yak 4 : 1)

**6** 1 Eyoñ mô't éziñ ya be mia a bili étom a mô'te mfe, ye a zômbô ke somane nye e be ba be ne ékotekot, a sa e be mimfufub ? 2 Ye mi nji yeme na, mimfufub mi aye tyi'i si nyô mejô ? a nge mi aye tyi'i si nyô mejô, ye mi ne ate'e ya tyi'i zesé mejô ? 3 Ye mi nji yeme na, bi aye tyi'i beéngel mejô ? ve abim avé mam ya ényíñe ji ! 4 ajô ete , nge mi bili mejô ye tyi'i aval ete , ye bôt be ne teke'e ésemen e kirke été, mmbe bete mi atelé betyi'i mejô ? 5 M'ajô jame di ane me ne ve mia ôson. Nalé ate, ye mfefek ô vo'o yené e be mia, wu w'aye bo ngul ya tyi'i mam e zañe bobenyañ ? 6 Ve monyañ a viane ke somane monyañ, a bo fe nalé e be ba be ne te buni ? 7 Bisoman zañe mia mia a ne éngôngole jam e zañe jenan. Amu jé mi aye bo te tôban ékotekot éte ? Amu jé b'aye bo te di mia ? 8 Ve miabebien mi abi ékotekot, a diane fe, a bo nalé mfa'a ya ba be ne mia bobenyañ. 9 Ye mi ne te yeme na, ba be ne bikotekot b'aye bo te nyoñe ngab éjôé Zambe ? Te du'uban ! Amu na, beke mangan, bekañe biyeñeyeña bi biôm, a bebo mejian, a befam b'andamane menyôle mab, a befam b'ayaé befam befe, 10 a miñwuwub, a mindôdok, a beso'o bilam, a bekobô bôt abé, a bezemimfaka, b'aye bo te nyoñe ngab éjôé Zambe. 11 Nde bevo'o ya be mia be mbe aval bôt ete ; ve mi nga sôban, mi nga tuneban, a mi nga kaléban a jôé Nti Yésus Krist wongan e Nsisime Zambe wongan.

### **Wumula'ane Zambe E Menyôle Menan**

( 2 Kor 5 : 14, 15 ; 1 Tés 4 : 1-7 ; 1 Pét 1 : 14-19)

12 Mam mese me ne boban mfa'a wom, ve sa mam mese m'avolô. Mam mese me ne boban mfa'a wom, ve me nji kômbô biban ôlo a jam éziñ. 13 Bidi bi ne jôme ya abum, abume ke jôme ya bidi, ve Zambe a ye bo de a bie bibaane na, bi ja ntuk. Nde nyôl é se ke jôme mejian, ve jôme Nti, a Nti jôme ya nyô. 14 Ve Zambe a nga wômôlô Nti, a ye fe wômôlô bia a ngule jé. 15 Ye mi ne te yeme na, menyôle menan me ne bibu'a bi Krist ? Nalé ate, ye me vaa bibu'a bi Krist a bo bie bibu'a bi minga bijabô ? Teke'e bebé ! 16 Nge na, ye mi ne te yeme na, mô't a ke lat a minga bijabô, baa nye be nto nyôle jia ? Amu e ne njôane na, Bebaane b'aye bo nsône wua. 17 Ve mô't a ke lat a Nti, baa nye be nto nsisime wua. 18 Mata'ane mejian. Abé ese mô't a bo, e ne nye nyôl atan, ve mô't a bo mejian, a bo nyôle jé émien abé. 19 Nge na, ye mi ne te yeme na, nyôle jenan é ne tempela Mfufub Nsisim ô too e be mia, ñwô mi bili w'aso e be Zambe, a na, mi nji bo jôme miabebien ; 20 amu mi nga kuseban a tañ. Nde wumula'ane Zambe a menyôle menan, mme me ne ma me Zambe.

### **Mam M'andêñele Mfa'a Ya Aluk**

( Met 2 : 18-25 ; Mat 19 : 3-12)

Rev. Matthias MEYE  
Secrétaire Général 1961.....

**7** 1 Nde mfa'a ya mam mi nga tili ma, E ne mveé mfa'a fame na, é bo te nambe minga ; 2 ve amu ajô mejian, fam ése é bili minga wé émien. 3 Nnôm a va'a ngal jam a yiane ve nye ; aval ete fe ngal mfa'a nnôm. 4 Ngal a nji bi ngulenjôan ya jôô nyôle jé émien, ve nnôm ; aval ete fe nnôm a nji bi ngulenjôane ya jôô nyôle jé émien , ve nga. 5 Te tyiane miabebien, nga ve mi yiliya nalé akui nté éziñ, ane mi aye yen mbamba éyoñe ya ye'elane Zambe ; wôna mi beta tabe vôme wua, nde ete Satan a ye bo te ve'ele mia, vôm mi ne te jôô menyôle menan. 6 Nde m'ajô jame di aval ane jame ya nkañesan, sa aval ane abendé. 7 Ve m'akômbô na bôte bese be bo aval ane mamien me né. Ve amu mô't ase a bili ngume mveane wé émien ô so'o be Zambe, nyina avale di, nyô mbo'o aval afe.

8 M'ajô ba be ne te nlu'an a minkuse na, e ne be mvaé nge b'atabe nkoé aval ane ma. 9 Ve nge b'akate jôô menyôle mab, be lu'uk. Amu d'adañe mvaé na, mô't a luk, sa na, a yôñ a nkômban. 10 Ve ba be ne minlu'an, m'ave be abendé, sa ke ma, ve Nti na, Ngal a bo'o te kôlô e be nnôm. 11 Ve nge a kôlô a tabe'e nkoé, nge na, a beta'a lat a nnôme wé nnôme ke a bo'o te suu nga. 12 Ve ma, sa ke Nti, m'ajô ba bevo'o na, Nge monyañ éziñ a bili ngal a ne te buni, a minga a kañese tabe baa nye, a bo'o te suu nye. 13 Minga fe a bili nnôm a ne te buni, a kañese tabe baa nye, a bo'o te suu nye. 14 Amu nnôm a ne te buni a téléban mfuban amu nga, a ngal a ne te buni a téléban mfuban amu nnôm. Nge sa nalé, bone benan b'aye bo mvin ; ve ane e nto, be ne mfuban. 15 Ve nge nyô a ne te buni a kôlô, a kôlô'ô, monyañ ate, nge kal éte, a nji bo nka'an. Amu Zambe a nga loene bia e mvo'é. 16 A minga, w'ayem aya, nge w'aye nyii nyo nnôm ? Nge na, A fam, w'ayem aya nge w'aye nyii nyo nga ?

### **Enyiñe Nti A Nga Tiñeti Mô't Ase**

( Rôm 6 : 18, 22 ; Fil 4 : 11, 12 )

17 Ve jame da, mô't ase a tabe'e ényiñ Nti a nga ve nye, nje Zambe a nga loene nye ; abendé di m'abendé e bekirke bese été. 18 Ye mô't éziñ a nga loban a nto ntyi'an atye ? A bo'o te jeñe na a vaa mendem ya ntyi'ane atye. Ye mô't éziñ a nga loban a too ébis ? A bo'o te jeñe na a tyi'iban atye. 19 Ntyi'an atyel ô nji lañebane na ô ne jam éziñ nge ébis, ve mba'alane mebendé me Zambe. 20 Mô't ase a tabe'e éto a nga loban. 21 Ye ô nga loban ô to ôlo ? A se ke ajô. Ve nge ô ne ngul te nyoñ éto nti, d'adañe mvaé na, ô bo nalé. 22 Amu ôlo ô nga loban e be Nti, ô nto nti e be Nti. Aval ete fe mô't a nga loban a too nti, a nto ôlo Krist. 23 Mi nga kuseban a tañ ; te boane belo be bôt. 24 A bobajañ, mô't ase a tabe'e éto a nga loban je été e be Zambe.

### **Minkoé A Minkus**

( Luk 10 : 40-42 ; Behéb 13 : 4 ; 1 Pét 4 : 7 )

25 Nde mfa'a ya ba be ne minkoé, me nji bi abendé Nti, ve m'ave fe'e jam, aval ane mô't a nyoñeya mvame Nti, a nto nyô ya buni. 26 M'asimesane na, amu mbia njuk a kuiya e be bia, e ne mvaé nge fam j'atabe aval é né. 27 Ye ô nto nka'an e be minga ? te jeñe na ô tabe zesé. Ye ô nto zesé e be minga ? te jeñ aluk. 28 Nde ja'ana w'aluk, ô nji ke bo abé ; a nge ngone minga j'aluk, a nji bo abé. Ve ba b'alu'u nalé, b'aye tôban étibela'a mfa'a ya minsôn ; ve m'akame mia je. 29 Nde, A bobajañ, jam m'ajô e ne na, mbamba éyoñ a lí'iya étua étun ; nde ete , ataté éyoñe ji, ba be bili

Rev. Matthias MEYE

binga, be bo aval ane nga be nji bi be ; 30 a ba b'ayi du, aval ane nge be nji yi ; a ba b'avak, aval ane nge be nji vak ; a ba b'akus, aval ane nge be nji bi bisa ; 31 a ba b'abelane si nyô, aval ane nge be nji tame belane je. Amu na, éyeka'a ya si ndône nyô j'alôt. 32 Nde m'akômbô na mi bo te biyebé. Môt a ne te nlu'an a tabe'e biyebé e mam me Nti, ane a ye nyemele Nti nlem. Ve môt a ne nlu'an, a ne biyebé e mam ya si nyô, ane a ya nyemele ngal nlem, 34 a minkômbane mié mi salaneya zañ. Nde minga a ne te nlu'an nge ngone minga, a bo'o biyebé mfa'a mam me Nti, ane a ye bo mfuban mfa'a ya nyô a nsisim ; ve minga a ne nlu'an a ne biyebé mfa'a mam ya si nyô, ane a ye nyemele nnôm nlem. 35 M'ajô jame di mfa'a ya mvolane wônan miabebien, sa na m'aka'a mi mbe'e, ve na m'atindi na mi bo nkôman ya ve miabebien mingumba e be Nti.

36 Nge môt éziñ a simesane na a nji bo aval d'ayian e be atin alu'u dé, , nge a nto évôm, a nye'e ke aluk, a bo'o jam a kômbô ; be luka'an, a nji bo abé. 37 Ve môt a yeme ngu e nleme wé été, a nji bo jame ya tyian, ve abili ngu mfa'a ya nkômbane wé émien, nde a tyi'ya na, a ye ba'ale ngo jé, môt ate a ye bo mvaé. 38 Nde môt a ve ngone jé aluk a bo mvaé, a môt a bo te ve jé aluk, a ye dañe bo mvaé. 39 Minga a nto nka'an nté ôse nnôm a vee ; ve nge nnôm a wôé, minga a nto nti ya ke alu'u e be nyô a kômbô, ve e bo'o e be Nti. 40 Ve mfa'a ya ntyi'ane wom, a ye dañe bo mvaé nge a ye tabe aval ane a né. M'asimesane na, me bili Nsisime Zambe.

### **Bidi Bi Nga Veban E Biyeñeyeña**

( Rôm 14 : 13-23 ; 1 Kor 10 : 19-33)

**8** 1 Ajô bidi bi nga veban e biyeñeyeña bi biôm, bi ayeme na, bia bese bi bili ñyemane mam. Nyemane mam w'akobô mebun, ve nye'an w'ayalé bôt. 2 Nge môt éziñ a simesane na, a yeme jam, a ngenane te tu'a yeme de aval ane a yiane yem. 3 Ve nge môt éziñ a nye'e Zambe, Zambe, Zambe fe a yeme nye. 4 Ajô ete , mfa'a ya bidi bi nga veban e be biyeñeyeña bi biôm, bi ayeme na éyeñeyeña jôm é se ngume jôm e si nyô, nalé fe teke'e Zambe mfe a né, ve wua étam. 5 Amu nge ba b'aloene na bezambe, be ne, to e yôb été, nge e si nyô, aval ane nge bezambe be ne abui, beti fe abui, 6 ve mfa'a wongan, Zambe a ne wua, nnye a ne Esa, nyô biôm bise bi aso e be nye, bia fe bi ne ve amu nye ; a Nti a ne wua, Yésus Krist, nyô biôm bise bi nga so amu nye, bia fe bi too amu nye.

7 Ve jame da, ñyemane wu ô nji bo e be bôte bese. Nde bevok, amu be maneya yembane a éyeñeyeña jôm éte azukui éyoñe ji, b'adi bidi bi nga veban be éyeñeyeña jôm ; a mone tyiña nleme wob, vôm ô ne atek, a nto mvin. 8 Nde, bidi bi nji télé bia e be Zambe. Nalé fe, nge bi abo te di, bi nji sube jôm ; to'o bi adi, bi nji dañe bôte befe. 9 Ve taba'an ntyel, a za bo na, éto beti mi bili j'aye bo mintetek ékolé ôbak. 10 Amu nge môt a yene wo môt ô bili ñyemane mam, ô too ésam ényeñeyeña jôm été, ye mone tyiña nlem wé a ye bo te nyoñe ngu, vôma ne atek, akekui a ye di bidi bi nga veban e biyeñeyeña bi biôm ? 11 Vôm ate, amu ñyemane mam wôé, môt a ne atek a viane foé, monyañ ate Krist a nga wu amu ajô dé. 12 Ve éyoñ mi abo bobenyoñ aval ete, a balé mona tyiña nleme wob a ne atek, éyoñ éte mi abo Krist abé. 13 Jam ete nde, nge bidi bi ne jôm j'akolé mojañ ôbak, m'aye ke di tit ne tya, ane m'aye bo te bo mojañ jôme ya kolé na a ku.

### **Ngul Ya Eto Nlôman**

( Luk 10 : 7 ; Gal 6 : 6 ; 1 Tim 5 ; 17, 18)

Rev. Matthias MEYE  
Secrétaire Général 1961.....

**9** 1 Ye me nji bo nti ? Ye me nji bo nlôman ? Ye me nji yene Yésus Nti wongan ? Ye mia mi nji bo mboane ésaé wom e be Nti ? 2 Nge me nji bo nlôman e be bôte befe ? ve me ne fo’o nalé mfa’a wônan, amu mia mi né éfeta’a ya éto nlômane jam e be Nti.

3 Nkat m’akat ajô dam e be ba b’afase ma, ñwô wu. 4 Ye bi nji bi ngul ya di a nyu ? Ye bi nji bi ngul ya wulu kal é ne ngal, avale fe ane minlômane mivo’o mise, a bobenyañ be Nti, a Kéfas ? 6 Nge na, ya ma étam a Barnabas, bi ne te ngul ya tyi mboan ésaé ? 7 za a tameya bo mone bezimbi, émien a yaka’ane tañ ya été ? Za a bé afub mindik, ve a bo te di bibuma ya été ? Nge na, za a ba’ale mbame mintômba, ve a bo te nyu menyañ ya mbam ? 8 Ye m’akobô mam mete ane fulu môt ? Ye metiñ me nji jô mam mete avale da ? 9 Amu e ne ntilan e metiñe me Môze na, “ W’aye bo te dib nnôm ényaka anyu éyoñ a tibi fes.” Ye beyôme binyaka étam mmbe Zambe a simesan ? 10 Ye sa fo’o fe ajô dangan, nde a jô nalé, E ne ntilane ajô dangane na, môt a senane si a yiane senane je a ndinlem ya bo nnyoñ ngab ya mekoé. 11 Nge bia bi nga mias mvôñ ya Nsism e be mia, ye e ne beta jam nge bi akôane biôm ya minsôn e be mia ? 12 Nge bôte befe be bili ngule nyôna mfa’a wônan, ye sa ke bia bi adañedañ ?

Ve bi nji belan ngule éte, nde bi aviane jibi mam mese, ane bi aye bo te dib mbamba foé Krist zen. 13 Ye mi nji yeme na, ba b’aséane biôm bi ne étyi, b’adi biôm bi aso e tempel été ? a ba baba’ale altar b’anyoñe ngab biôm ya altar ? 14 Aval ete fe Nti a nga bendé na, ba b’akate mbamba foé, b’aye nyiñ a mbamba foé. 15 Ve me nga bo te belan ngule jia ya été, nde fe, me nji tili mam ma amu na, mam mete me boban e be ma. Amu a ne mvaé na, me wu, a dañe na, môt a vaa ma énguñe jam ! 16 Amu nge m’akat mbamba foé, me nji bi jam ya wumu de mamien. Amu e ne ma ajô ntindan. Ngo’o ma, nge m’abo te kat mbamba foé ! 17 Amu nge m’abo jame di amu nkômbane wom mamien, me bili ma’an ; ve nge sa amu nkômbane wom mamien a nto ésaé é nga veban e be ma. 18 Nde ma’ane mam me ne jé ? Ve na, nkatan m’akate mbamba foé teke’e ma’an, nalé m’aye bo te belan ngule jam mfa’a ya ésaé mbamba foé.

19 Amu akôsabô me mbe nti nalé mfa’a bôte bese, me nga bo mamien ôlo mfa’a ya bese, nde ete me ne dutu abui. 20 Nde mfa’a Beyude, me nga bo mamien ane mone Beyude, nde ete me ne dutu Beyude. Mfa’a ya ba be nga too e metiñe si, me nga bo mamien ane nge me ne e metiñe si, nde me ne dutu be be too e metiñe si. 21 Mfa’a ya ba be mbe te metiñ, aval ane me ne te metiñ, ve sa na, me ne te metiñ mfa’a Zambe, ve me too e metiñ me Krist e si, nde ete me ne dutu b be mbe te metiñ. 22 Me nga bo mamien ntentek mfa’a ya dutu mintentek, Mfa’a ya bôte bese, me boya mam mese, nde ete a mezene mese me ne nyii bevo’o ya été. 23 Nde, m’abo mam mese ma amu ajô mbamba foé, nde ete me ne kabane bibotane ya été.

24 Ye mi nji yeme na, ba b’asôngane mimbi, bese fo’o b’asôngan, ve wua étam nye a nyoñ mvak ? Sônga’ane fe aval ete, ane mi ne fo’o bi je. 25 Nde môt ase a sôngan e bivôé été, a jôô nyôle jé mfa’a ya mam mese. Nalé fo’o b’abo, nde ete, b’aye nyoñ ékat é ne ngul ya ja ntuk ; ve bia, ji é ne te ngul ya ja ntuk. 26 Nalé fe ma m’ake mbil aval ete, sa ane môt a dimi mfa’a a ke. Aval ete fe me ne nlumane bikuta, sa ane môt a bibi ñyem ; 27 ve m’atu’u nyôle jam na, me timili je ôlo, a za bo na, éyoñ me maneya kate bôte befe mbamba foé, mamien me viane bo te nkañesan.

**Meleb Ya Nkañane Biyeñeyeña Bi Biôm**

( Besam 78 : 13-33 ; 106 : 9-20 ; Behéb 3 : 7-19)

Rev. Matthias MEYE  
Secrétaire Général 1961.....



## 10

1 Amu, A bobejañ, me nji kômbô mi dimi, betate be mbe nkute si besse, a na, bese be nga tulane mañ ; 2 a na, bese be nga baptizôban a Môze e nkut a mañ été ; 3 a bese be nga di avale bidi da ya nsisim, 4 a bese be nga nyu avale ényunyui jia ya nsisim ; amu be nga bo be nya'a mendim me so'o Akôm ya nsisim, mme me tôñe be, Akôm ete e mbe Krist. 5 Ve Zambe a nji yen abui ya be be mvaé : nde be nga tyi'i e nkôte si été. 6 nde mam mete me ntoo bia bive'ela'a, ane bi aye bo te kômbô mbia be mam, aval ane be nga bo. 7 Nalé fe te boane bekañe biyeñeyeña bi biôm, aval ane bevo'o ya be be ; ane e ne ntilane na, Bôt be nga tabe si a di a nyu, a kôlô e si a jem. 8 Nalé fe mbo'ane te bo mejian, ane bevo'o ya be be be nga bo, ane be nga ku mimbime si, môse wua, toyini mewôm mebaé a éla. 9 Nalé fe te ve'ela'ane Nti, ane bevo'o ya be be be nga bo, ane be nga jañ a benyo. 10 Nalé fe te kobane menyiiñ, ane bevo'o ya be be be nga bo, ane be nga jañ a Njiane bôtô. 11 Nde mam mete me nga kui be be ane bive'ela'a, a me nga tiliban mfa'a ya lebe bia, bia bete bi kuiya asu'ulan ya biyoñ. 12 Ajô ete nde môt a simesane na, a tele, a tabe'e ntyel, a za ku. 13 Teke'e meve'ele m'akui e be mia, vengevenge ve ma m'ayiane môt. Zambe a ne nyô ya buni, a ye bo te me'ete na, mi yene meve'ele m'alôt ngule jenan. Ve ane meve'ele, a ye kôme fe zen, ane mi ne sa'ale me.

14 Jam ete nde, A bôt m'anye'e, mata'an nkañane biyeñeyeña bi biôm. 15 M'akobô ane môt a kobô mimfefek ; miabebien tyi'ane jam m'ajô. 16 Elaé ébotan bi abotan, ye é nji bo mfula'ane ya metyi me Krist ? Fembé bi abek, ye é nji bo mfula'ane ya nyôle Krist ? 17 Amu na, bia, bi ne abui, bi ne mmamane wua, nyôle jia ; amu bia bese bi akabane fembé éte jia. 18 Tuka'a fomban Israél mfa'a ya minsôn : ba b'adi metuna'a, ye be nji bo ba b'akabane biôm ya alter ? 19 Nde m'ajô aya ? Ye na, metuna'a b'aty'i biyeñeyeña bi biôm me ne ngume jôm, nge na, ye éyeñeyeña jôm é ne ngume jôm ? 20 Ve jam m'ajô e ne na, metuna'a b'aty'i biyeñeyeña bi biôm, b'aty'i me mbia minsisim, a sa Zambe ; nde me nji kômbô na, mi kabane biôm mia be mbia minsisim. 21 Mi se ngul ya nyu élaé Nti, a nyu fe élaé mbia minsisim. Mi se ngul ya nyoñ ngab e tawôla Nti, mi nyoñe'e fe ngab e tawôla mbia minsisim. 22 Nge na, ye bi asoñ Nti na a suñ aban ? Ye bi adañe nye ngu.

### **Bo'ane Mam Mese Mfa'a Duam Zambe**

( Rôm 14 : 13-23 ; 1 Kor 8 )

23 Mam mese m'ayian, ve sa mam mese m'avolô. Mam mese m'ayian, ve sa mam mese m'ayale bôt. 24 Môt a bo'o te jeñe mam mé émien, ve ma môt mbok. 25 Jôm ése j'akuan éwônga, jakan, te silane minsili amu mone tyiñe nlem. 26 Amu si nyô é ne jôme Nti, a biôm bise bi ne été. 27 Nge môt éziñ ya ba be ne te buni a loene mia ésulane bidi, a mi too na mi ake, jôm ése b'aye télé mia, jakan, te silane minsisli amu mone tyiña nlem. 28 Ve nge môt éziñ a jô mia na, Jôm ji j'ate tyi'iban e be ngunemelan, éyoñ éte te diane je, amu ajô môt a te kpwaane wo jam ete, nalé fe amu mone tyiña nlem : 29 Nde m'ate jô na, Ajô mone tyiña nlem ; sa éñwôé, ve nyôa môte mbok. Amu na, éto jam j'ayiane tyi'iban ajô a mone tyiña nleme môte mfe a za éfia ? 30 Nge ma m'anyoñ ngab éziñ ya mvean akéva, amu jé jôm m'ave je akéva, m'abeta biaséban amu jé ? 31 Ajô ete, ja'ane mi adi, nge nyu, nge bo jam éziñ afe, bo'ane mam mese mfa'a ya duma Zambe. 32 Te boane jam d'akolé ôbak, ja'ane mfa'a Beyude, nge mfa'a Begrek, nge mfa'a kirke Zambe : 33 aval ane ma fe m'abo mam mese na me nyemele bôte bese nlem, te jeñe jam d'avolô mamien, ve di d'avolô bôt abui, nde ete be ne nyiiban.

Rev. Martinus MEYE  
Secrétaire Général 1961.....

# 11

1 Bo'ane Bevu bam, aval ane ma fe m'avu Krist.

## Ane Binga B'ayiane Buti Minlô

( 1 Kor 14 : 40 ; Ef 5 : 22-24 ; 1 Tim 2 : 8-14)

2 Nde m'ase'e mia amu mi asimesane ma mfa'a ya mam mese, a amu mi bili miñye'elan aval ane me nga kalane mia mie. 3 Ve m'akômbô mi yeme na, Krist a ne nlô mfa'a ya fam ése ; a fame fe nlô mfa'a minga ; a Zambe ke nlô mfa'a Krist. 4 Fam ése j'aye'elan nge kulu mejô, é be'e jôm éziñ é butu nye nlô, j'ave nlô wé ôson. 5 Ve minga ase, a ye'elan nge kulu mejô, te yen a be'e éyañese, a ve nlô wé ôson, amu éyoñ éte a nto aval ane nge a sôtéya ntui. 6 Amu nge minga a bo te be'e éyañese, a seba'ane fe ési. Ve nge e ne minga ôsone na, a seban ési, nge na, a sôtéban ntui, a tame jaé éyañese. 7 Amu fam é nji yiane fo'ô buti nlô, amu é ne éyeka'a étôto'o Zambe, minga nnye a ne étôto'o fam. 8 Amu na, fam é nji so e be minga, ve minga a nga so e be fam. 9 Nalé fe fam é nga bo te téban amu minga, ve minga amu fam. 10 Amu ajô ete nde minga a yiane bi éyañesa e nlô, amu beéngel. 11 Ve akôsabo nalé, e be Nti, minga a nji bo nge te fam, a fam é nji bo nge te minga. 12 Amu na, aval ane minga a nga so e be fam, aval ete fe fam j'abialé e be minga. A biôm bise bi aso e be Zambe. 13 Miababien tyi'ane jame di : ye d'ayiane minga na, a ye'elane Zambe te yen a too nlô mbutan ? 14 Ye éyem abialé ébien é ne te ye'ele mia na, nge fam é bili ayab ési, jam ete e ne nye ôson ? 15 Ve nge minga a bili ayab ési, jam ete e ne nye jam mebun ; amu na, ayab ésile dé é nga veban e be nye ane ébuta'a. 16 Ve nge mô't éziñ a yené ane nyô a nye'e ntañete, bi nji bi avale fe'e afe ; nalé fe bekirke ya Zambe be nji bi.

## Mbia Mboan Ya Tawôla Nti

( 1 Sam 2 : 12-17 ; Mat 26 : 26-28 ; Mark 14 : 22-25 ; Luk 22 : 19, 20 ; 1 Kor 10 : 16, 17)

17 Ve jam m'azu lebe mia di, nde me ne te se'e mia été, amu na, éyoñ mi asulan, sa mfa'a ya jam d'adañe mvaé, ve di d'adañ abé. 18 Amu ôsusua, éyoñ mi asulan e kirke été, m'awô'ô na, minkandane mengam me ne be mia, a m'abuni mam mevo'ô ya été. 19 Amu mengam m'ayiane fo'ô bo e be mia, nde ete ba be ne nkañesan be ne litiban e be mia. 20 Ajô ete, éyoñ mi asulane vôme wua, e nji bo na, mi adi Bidi bi Nti. 21 Amu na, ndian mi adi, mô't ase a ji'a mane di bidi bié ; a wua a wô'ô zaé, nyô mbok a so'ô bilam. 22 Aya ! ye mi nji bi menda ya di a nyu été ? Nge na, ye mi abiasé kirke Zambe, a ve ba be ne te bi jôm ôson ? M'aye jô mia aya ? Ye m'aye se'e mia mfa'a ôte. Kokoo, me ne te se'e mia.

## Ntéane Bidi Bi Zambe

Rev. Matthias MEYE  
Secrétaire Général 1961.....

23 Amu jam me nga nyoñ e be Nti, nde me nga kee mia, e ne na, Nti Yésus, alu a nga koñebane de, a nga nyoñe fembé ; 24 nde éyoñ a nga mane ve akéva, a nga be'e je, a jô na, Nyina é ne nyôle jam, nje éte é ne amu ajô denan,

bo'ane jame di, ane mi aye simisane me été. 25 Aval ete fe a nga nyoñe élaé, éyoñ be nga mane di, ane a nga jô na, Elaé ji é ne mféfé élat ya metyi mam ; bo'ane jame di, menyu mese mi anyu je, mi simesa'ane me été. 26 Amu na, medi mese mi adi fembé nyô, a nyu fe kobe nyô, mi akañete awu Nti akekui a ye so.

### Nyoñane Bidi Bi Aval E Ne Te Yian

27 Nalé ate mô't a di fembé éte, nge nyu élaé Nti aval e ne te yian, a ye bo mekua ya nyôl a metyi me Nti. 28 Nde mô't a yemela'an émien, a nalé ate a ja'a fembé éte, a nyu fe élaé éte. 29 Amu mô't a di a nyu, te yemelane nyôl éte, nnye a di a nyu mekua mé émien. 30 Amu ajô ete abui bôt ye be mia e nto mintetek a mintutuñ, a ba bevo'o be nto ôyo. 31 Ve nge bi atu'a yemelane biabebien, bi aye bo te veban mekua. 32 Ve éyoñ Nti a ve bia mekua, bi abômban, nalé ate bi aye bo te nyoñe mekua, bia be si nyô. 33 Nalé ate nde, A bobejañ, éyoñ mi asulane na mi azu di, mi bo mi yanga'an. 34 Nge mô't éziñ a wô'ô zaé, a tame di nda jé, nde ete mi aye bo te sulan na mi vebane mekua. Mfa'a ya mam mevok, m'aye lebe mia éyoñ m'aye zu.

### Mimvean Ya Nsisim

( Ef 4 : 4-12)

**12** 1 Mfa'a ya mimvean ya nsisim, A bobejañ, me nji kômbô na mi dimi. Mi ayeme na, éyoñ mi mbe bedimi Zambe, mi nga woneban e be mimvumvu'u biyeñeyeña bi biôm, aval ese mi nga bo mi dutuba'an. 3 Jam ete nde m'atu'a kate mia na, teke'e mô't a kobô Nsisime a ne jô na, Yésus a ne biyo'é ! a teke'e mô't a ne jô na, Yésus a ne Nti, vengeance ve a Mfufub Nsisim.

4 Nde mimvean mi aselane mevale meva, ve Nsisim ô ne wua ; 5 a bisaé bi aselane mevale meva, ve Nti wua ; 6 a mimboan mi aselane mevale meva, ve Zambe a ne wua, nyô a bo mam mese e be bôte bese. 7 Ve nlitane Nsisim w'alitiban w'aveban e be mô't ase, mfa'a ya volô bôt. 8 Nkobô fe'e w'aveban a Nsisim e be mô'te wua, e be mfe, nkobô ya ñyemane mam a avale Nsisime da, 9 a be mfe, mbunan a avale Nsisime da, e be mfe, mimveane ya saé akon, a Nsisime wua, 10 e be mfe, mboane bitua bi mam, e be mfe, minkobô mevale meva, e be mfe, nkulane mejô, e be mfe ngule ya yemelane minsisim, e be mfe nkôñelane minkobô. 11 Mam mese ma m'aveban a mô'te wua, Nsisime wua ôte, ñwô w'akab e be mô't ase, aval ane w'akômbô.

### Nyôle Jia A Bibu'a Abui

( Rôm 12 : 3-8 ; Gal 6 : 2 ; Ef 4 : 4-16 ; Fil 2 : 1-4 ; 1 Pét 4 : 10, 11)

12 Amu aval ane nyôl é ne jia, é bili fe bibu'a abui. ve bibu'a bise ya nyôl, akôsabo bi ne abui, bi ne ve nyôle jia ; nalé ate fe Krist a né. 13 Nalé fe a Nsisime wua bia bese bi nga baptizôban a bo nyôle jia, to Beyude nge Begrek, to belo nge beti ; a bia bese bi nga nyu Nsisime wua. 14 Nalé fe nyôl é nji bo ébu'a jia, ve abui. 15 Nge akul abo d'aye

Rev. Matthias MEYE  
Secrétaire Général 1961.....

jô na, , Vôm me nji bo akule wo, me nji bo jôm ya nyô ; sa amu jame ete nde e ne te bo jôm ya nyôl. 16 Nde nge alo d'aye jô na, Vôm me nji bo dis, me nji bo jôm ya nyô ; sa amu jam ete nde e nji bo jôm ya nyô. 17 Nge ngume nyôl ô too bo ve dis, wôna ñwô'an ô boo vé ? 18 Ve jame da, Zambe a nga telé bibu'a, ébu'a ése ya été é ne nyôl été, aval ane a kômbô. 19 Nde, nge bise bi too bo ébu'a jia, nyôl é boo vé ? 20 Ve da, bibu'a bi ne abui, ve nyôl é ne jia. 21 Nde dis e vo'o jô akule wo na, Me nji yi jôm éziñ e be wo. Nge ke na, nlô ô jô mekule mebo na, Me nji yi jôm éziñ e be mia. 22 Ve a dañedañe na, bibu'a bi nyôl bi awum ane bi bi adañ atek, mbie bi adañe volô ; 23 a mefôla menyôl bi asimesane na, me bili ôbe ésemen, mme bi aviane dañe jalé ésemen ; a mefôla me nyôl me ne ôson, m'aviane bo ma me ne abeñ d'adañ ; 24 Amu na, mefôla menyôle mangan me ne abeñ me nji yi jôm éziñ. Ve Zambe a nga bundane nyôle nalé, a ve afôla e ne te ésemen, ésemen j'adañ, 25 nde ete nyôl j'aye bo te kandane mengam, ve na, bibu'a ya été bi ba'alane jia é ba'ale'e ji évok ; 26 a ja'an ébu'a jia j'awô'ô mintae, bibu'a bise bi afulane wô'ô mintae a je ; nge ébu'a jia é bo ke étôtok, bibu'a bise bi afulane wô'ô mevak a je.

27 Nde mia, mi ne nyôle Krist, a mô't ase ébu'a ya été. 28 Nde Zambe a nga telé bevok e kirke été, ôsusua minlôman, nsamba baa bekulumejô, wu lale beye'ele, wôna bebo bitua bi mam, wôna besaé akon, bevolô, belebe bôt, bekobô minkobô mevale meva. 29 Ye bese be ne minlôman ? Ye bese be ne bekulumejô ? Ye bese be ne beye'ele ? Ye bese be ne bebo bitua bi mam ? 30 Ye bese be bili mimvean ya saé akon ? Ye bese b'akobô minkobô mife ? Ye bese b'akôñelan minkobô ? 31 Ve mi ayiane dañe yi mimveane minnen.

### Nye'an

( Mat 22 : 36-40 ; Rôm 13 : 8-10 ; Kol 3 : 1-4 ; 1 Yôh 3 : 16-19 ; 4 : 7-12 , 16-21)

Ve da, zen j'adañe mvaé, nje m'azu liti mia nyô

**13** 1 Nge m'akobô minkobô mi bôt a mi beéngel, ve me too te bi nye'an, me nto angônga d'aduñ, nge bizañ bi aduñ ne ñbwamñbwam. 2 Nge me bili ngul ya kulu mejô, a yeme minsolane mi mam mise, a ñyemane mam ôse, nge me bili mbunan ôse ane me ne vaa minkô, ve te bi nye'an, me se ke jôm. 3 Nge m'akabe bôt biôm bise me bili, a na, nge m'akee nyôle jame na, é dik, ve me too te bi nye'an, me nji nyoñe jôm meyak.

4 Nye'an ô ne ñwuanenlem, nye'an ô ne mvam, te mensengan, te ngunguan, te mebun, 5 ô ne te bo mam me ne te yian, ô nji jeñe mam mé, te soñe mô't, te lañesan abé, 6 ô nji vak a ékotekot, w'afulane vak a benya mejô. 7 nye'an w'azômbô be'e mam mese, w'abuni mam mese, w'atabe mem mese ndi, w'ajibi mam mese.

8 Nye'an ô vo'o man ; ve ja'ane minkulane mejô, mi aye te'elan ; nge minkobô mi ne, mi aye man ; nge ñyemane mam ô ne, w'aye te'elan. 9 Amu na, bi ayeme mam éfas, a bi akulu mejô ve éfas ; 10 ve éyoñe jôm é ne ngum j'aye so, jôm é ne éfas j'aye te'elan. 11 Eyoñ me mbe mongô, me nga bo me kobô'ô aval ane mongô, me nga bo me fase mam ane mongô ? Eyoñ me nga bo nya mô'tô, me nga findi mam me mongô. 12 Amu éyoñe ji bi ayen ane éyen été, bijujuk. Ve éyoñ éte bi aye yenan mesu mesu. Eyoñe ji m'ayem éfas, ve éyoñ éte m'aye tu'a yem, avale fe ane me nga tu'a yemban. 13 Nde éyoñe ji mbunan, a ndinlem, a nye'an bi too, mam ma mela ; ve jam d'adañ e ne nye'an.

## Minkobô A Nkulane Mejô

( Rôm 14 : 19 ; 1 Kor 12 : 4-7, 27-31 ; 1 Pét 4 : 10, 11)

### 14

1 Tôñesa'ane nye'an, nyameta'ane mimvean mi Nsisim, ve adañedañe na ; mi kulu mejô, 2 Amu mô't a kobô nkobô mfe, a nji kobô bôt, ve Zambe ; amu na, teke'e mô't a wô'ô jam ya été ; ve a kobô minsolane mi mam e Nsisim été. 3 Nde mô't a kulu mejô, nnye a kobô bôt ane a ne yale be, a tebele be, a volô be minlem. 4 Mô't a kobô nkobô mfe, a yale émien, ve mô't a kulu mejô a yale kirke. 5 Nde m'akômbô na, mia bese mi kobô minkobô mife, ve m'adañe kômbô na, mi kulu mejô. Nde mô't a kulu mejô, a nyô a kobô nkobô mfe, nyô a kulu mejô nnye a dañ, nga ve a kôñelane mam a te jô, nde ete kirke é ne yalebani.

6 Nde, A bobajañ, nge d'abo na, m'azu e be mia, me kobô'ô minkobô mife, m'aye volô mia jé, vengevenge ve m'akômbô mia a nkulane mam, nge ñyemane mam, nge nkulane mejô, nge ñye'elan. 7 Ja'ane bibôbôma bi nji bi ényañ bi akuli tyiñ, ane ndiñ nge mvet, nge bi ne te ve nsuma tyiñ éziñ, mô't a ne yeme jam b'aloñ été aya, nge di b'abôm ? 8 Nalé fe nge toñ j'akobô tyiñe bôt b'adimi, za a ye kômesan mfa'a ya bita ? 9 Nalé ate fe mia, éyoñ mi akobô nkobô mfe, nge mi nji kobô mejô bôt be ne wôk, b'aye yem jam d'ajôban, aya ? amu tyiñe jenan j'aye viane ke e ñyem. 10 Teke'e bisô na, minkobô mi ne mevale meva e si nyô, a teke'e wua ya été ô ne te mesuu. 11 Nde nge mi nji yem mesuu ya nkobô ôte, m'aye bo mone bilobelobé e be nyô a kobô wô, a mô't a kobô wô a ye bô mone bilobelobé mfa'a wom. Nalé ate mia fe, amu mi anyamete minlitane ya Nsisim, suñane na, mi dañ mfa'a ya ñyalane kirke. 13 Jam ete nde, mô't a kobô nkobô mfe, a ye'elan ane a ne kôñelane mam ya été. 14 Amu nge m'aye'elan a nkobô mfe, nsisime wom w'aye'elan, ve nleme wom teke'e wum bibuma. 15 Nde jam ete e ne aya ? Ve na, m'aye ye'elan a nsisim, m'aye fe ye'elan a nlem. 16 Nge sa nalé, éyoñ w'abotan a nsisim, mô't a dimi a ye jô Amen aya ? mvean w'aye ve akéva, vôm a ne te yeme jam w'ajô ? 17 Amu wo fo'ô w'ave akéva mvaé, ve ô ne te volô nyô mbok. 18 M'ave Zambe akéva ane m'akobô minkobô mife a dañe mia bese ; 19 ve akôsabo nalé, a kirke été, m'akômbô kobô mejô metan a fe'e jam, ane m'aye ye'ele bôte befe, a dañe na, me kobô mejô toyini awôm a nkobô mfe.

20 A bobajañ, te boane ane bôngô mfa'a ya minsimesan, ve minkeñelé mfa'a ya mbia be mam, ve mfa'a ya minsimesan, bo'ane benya bôtô. 21 Ene ntilane e metiñe na,

“M'aye kobô bôte ba a biye'ane minkobô a biyaé bilobelobé, a ja'ana nalé b'aye ke vô'ôlô, nalé Nti a jô.”

22 Nalé ate minkobô mife mi ne ndem, sa mfa'a ya ba b'abuni, ve mfa'a ya ba be ne te buni. Ve nkulane mejô ô ne ndem, sa mfa'a ya ba be ne te buni, ve mfa'a ya ba b'abuni. 23 Ajô ete, nge ngume kirke ô sulaneya vôme wua, a bese b'akobô minkobô mife, wôna bôt b'abuni mie, nge ba be ne te buni, b'anyiin été, ye b'aye bo te jô na, mi aso'ô étyi ? 24 Ve nge bese b'akulu mejô, a mô't a ne te buni, nge nyô a dimi minkobô, a nyiin été, bese b'aye kpwéé nye, bese b'aye fase nye, 25 minsolane mi mam ya nleme wé mi alitiban. Nalé ate a ye buti asu si a kañe Zambe, a kañeta na, Zambe a ne fo'ô e be mia.

**Mam Mese Me Boba'an Ngômô'tô**

Rev. Matthias MEYE  
Secrétaire Général 1961.....

26 Nde jam ete e ne aya, A bobajañ ? Ve na, éyoñ mi asulane vôme wua, mô'te wua a bili jam éziñ, a mfe ñye'elan éziñ, a mfe nkulane mam éziñ, mfe nkobô mfe éziñ, mfe a kôñelane nkobô éziñ. Mam mese me boba'an

mfa'a ya yale bôt. 27 Nde nge môt a kobô nkobô mfe, be suku'u bebaé, nge na, te lôte bela, wua a tôñe nyô mbok, a môt éziñ a kôñela'ane mam ya été. 28 Ve nge nkôñelane mejô a nji bo, wôna a tabe'e évôl ésulane ya ngume kirke été ; a kobô'ô émien, a Zambe. 29 Bekulumejô fe be kobô'ô bebaé nge bela, a bevo'o be yemela'ane mam ya été. 30 Ve nge nkulane mam ô litibaneya e be môt mfe a too valé, nyô ya ôsu a tabe'e évô. 31 Amu mia bese mi ne ngul ya kulu mejô, wuwua wuwua, ane bese be ne ye'é, a bese be ne tebelan. 32 Nde minsisim bekulumejô mi asuu mibien e si e be bekulumejô ; 33 amu Zambe a nji bo nyô ya nzametane mam, ve mvo'é.

Aval ane b'abo e be kirke mimfufub bese, 34 binga be tabe'e évôl e be kirke été : amu na, e nji bo be nkañesane na, be kobô, ve na, be suu bebien e si, aval ane metiñ m'ajô. 35 Nde nge b'akômbô ye'é jam éziñ, be sili'i beyôme bap bebien e nda. Amu a ne minga ôsone na, a kobô ésulane kirke été. 36 Ye mejô me Zambe me nga té be mia, ye na, me nge kui ve e be mia étam ?

37 Nge môt éziñ a simesane na, a ne nkulumejô, nge nyô ya nsisim, a yeme na, mam m'atili mia me ne mam Nti a bendé. 38 Nde, nge môt éziñ a nji yeme nalé, nye fe a ye ke yemban. 39 Nalé ate nde, A bobajañ, nyameta'ane nkulane mejô, a te kamane ba b'akobô minkobô mife. 40 Ve mam mese me boba'an a fek a ngômôtô.

### **Nwômane Krist**

( Mat 28 ; Mark 16 ; luk 24 ; Yôh 20 : 21 ; M.M. 1 : 3 ; 9 : 1-7)

**15** 1 Nde, A bobajañ, m'abo na mi yem ajô mbamba foé me nga kate mia, nyô mi nga nyoñ, a nyô mi tele été, 2 nyô fe mi nga nyiiban amu nye, nge mi yeme ngul été, nga ve mi nga buni ébunibuni. 3 Amu mfañe jam me nga tate kee mia e mbe jam ma fe me nga nyoñ, na, Krist a nga wu ajô mam abé mangan aval ane mintilan ; 4 a na, a nga jambe, a na, a nga wômô e môse lale aval ane mintilan ; 5 a na, a nga yené e be Kéfas, wôna e be minlôman awôm a mibaé. 6 Mvus éte a nga yené e be bobenyañ b'adañe mintete mitan éte jijia, mmbe bete abui ya été a ngenan a vee azukui éyoñe ji, ve ba bevok be keya ôyo. 7 Mvus éte a nga yené e be Yakôbus, wôna e be minlôman mise ; 8 a mvus ya bese a nga yené fe e be ma, aval ane nsolôkane mon. 9 Amu ma m'adañe tyôtyoé a minlôman mise. Me nji yiane lobane na, nlôman, amu me nga kpwe'ele kirke Zambe. 10 Ve amu mvame Zambe, me nto nyô me né ; a mvame jé mfa'a wom é nji bo zesé jôm, akôsabo nalé, ve me nga bo ésaé a dañe nyô ase ya be be ; sa ke ma, ve mvame Zambe é too e be ma. 11 Ajô ete ja'ana a mbe ma, nge be, ve nalé ate bi akate mbamba foé, a nalé ate fe mi nga buni.

### **Nwômane Miñwuan**

( Luk 20 : 27-38 ; Rôm 5 : 12, 17 ; 1 Tés 4 : 13-18 ; 2 Tim 2 : 8, 16-18 ; 1 Pét 1 : 3-5)

12 Nde nge foé j'akatebane na, Krist a nga wômô akôlô miñwuan, wôna bevo'o ya be mia b'ajô aya na, ñwômane miñwuan ô nji bo ? 13 Nde nge ñwômane miñwuan ô nji bo, wôna Krist fe a nji wômô. 14 Nde, nge Krist a nji wômô, nalé fe nkatane foé wongan ô nto évôvôla, mbunane wongane fe évôvôla, 15 a b'azu fe koé na, Bi ntoo bengaa be ne minsos ajô Zambe, amu bi nga kañete ajô Zambe na, a nga wômôlô Krist, vôm a nji wômôlô nye, nge e ne fo'o na, miñwuan mi ne te wômô. 16 Nde nge miñwuan mi ne te wômô, wôna Krist fe a nji wômô. 17 Nde, nge Krist

a nji wômô, wôna mbunane wônan ô ne zesé : mi ngenan e mam abé menan été. 18 Nalé ate ba be keya ôyo e be Krist be jañeya. 19 Nge bi too ndi e be Krist ve ényĩne jina étam, wôna bi ayene na, bi ne éngôngol a dañe bôte befe bese.

20 Ve éyoñe ji Krist a maneya wômô akôlô miñwuan, mbômô ya be ba be nga ke ôyo. 21 Amu vôm awu e nga so amu môte wua, ñwômane miñwuan w'aye fe so amu môte wua. 22 Amu aval ane bese b'awu e be Adam, aval ete fe bese b'aye veban ényĩñ e be Krist. 23 Ve môt ase a nsamba wé ; Krist nnye a ne mbômô ; mvus éte ba be ne ba be Krist éyoñ a ye so ; 24 wôna asu'ulan, éyoñ a kee Zambe Esaa éjôé, valé a maneya te'elan éjôé ése, ngulenjôan ése a ngul ése. 25 Amu a yiane jôô akekui a maneya bôôé besiñe bé bese e mebo mé si. 26 Susu'a nsiñ a ye jian, nnye a ne awu. 27 Amu Zambe a maneya sili biôm bise e mebo mé si. Nde vôm d'ajôbane na, Biôm bise bi maneya silibane si e be nye, e ne bebela na, nyô a nga sili biôm bise si e be nye, nnye a ne vengevenge ya été. 28 Ve éyoñ biôm bise bi maneya silibane si e be nye, éyoñ éte Mon émien a ye suubane si e be nyô a nga sili biôm bise si e be nye. Nde ete Zambe a ye bo mam bese e be bise.

29 Wôna ba be nga baptizôban amu ajô miñwuan, b'abo de amu jé ? Nge miñwuan mi vo'o wômô, amu jé b'abeta fe baptizôban amu ajô dab ? 30 Bia fe, bi tele angôndô été awolo ase ? 31 M'akan ngana, A bobajañ, a mebune mam me bili e be mia, mme me bili e be Krist Yésus Nti wongan, m'awu môs ane môs ! 32 D'avolô me jé, m'akobô ane bôt, amu jé me nga wosan betit Efésus ? Nge miñwuan mi ne te wômô, bi tame di a nyu, amu akiti bi aye wu. 33 Te du'uban ; amu mbia mindula mi andamane biyem bi ne mvaé. 34 Beta'a boane fek, a te boane abé ; amu bevo'o be nji bi ñyemane Zambe. M'ajô jame di na me ve mia ôson.

### Nwômane Nyô

( Dan 12 : 3 ; Fil 5 : 20, 21 ; 1 Tés 4 : 13-18 ; 1 Yô 3 : 2 )

35 Ve môt éziñ a ya sili na, Miñwuan mi aye wômô aya ? Mi aye so, mi bili za aka'a nyôlô ? 36 A nsusu'u môt ! Jôm w'amien w'amias, é nji nyiñ, te tame wu ; 37 a jôm w'amias, ô nji mias nyôl j'aye bo, ve nsoé fes, éyoñ éziñ wu blé, nge fes éziñ fe. 38 Ve Zambe a ve je nyôl aval ane a nga kômbô, a fes ése avale nyôle dé. 39 Minsône mise mi nji bo avale da ; ve minsône mi bôt mi ne avale dab, a minsône betit mi ne avale afe, a minsône mi anon avale afe, a minsône mi kos avale afe. 40 Biôm ya yôb bi bili fe menyôle mab, a biôm ya si nyô, menyôle mab ; ve menyôle ya yôb me be'e étôtok avale dab, a ma ya si nyô aval afe. 41 Etôto'o jôb é ne avale dé, a étôto'o ngon aval afe, a étôto' ateté aval afe, a ja'an ôtété va vi aselan ôtété ôvok étôtok.

42 Nalé ate fe ñwômane miñwuan ô né : jôm j'amiasaban é too ébo ; j'awômô, é too te boé. 43 J'amiasaban é too ôson ; j'awômô, é too étôtok. J'amiasaban é too atek ; j'awômô é too éwôwlô. 44 J'amiasaban é too nyôle ya minsôn ; j'awômô é too nyôle ya nsisim. Nge nyôle ya minsôn é ne wôna nyôle ya nsisim é ne fe. 45 Nalé ate fe e ne ntilane na, " Adam, môt ôsu, a nga bobane vevea môt ;" Adam mvua a nga bo a nga bo nsisim w'ave ényĩñ. 46 Sa jôm ya nsisim nje é ne jôm ôsu, ve ji ya minsôn ; mvus éte, ji ya nsisim. 47 Môt ôsu a nga so e si, e metek ; môte baa a nga so e yôb. 48 Aval ane môt ya metek a né, aval ete fe ba be ne ba ya metek be né. Aval ane môt ya yôb a né, aval ete ba be ne ba ya yôb be né. 49 Nde avale fe aval ane bi be'e éyeka'a môt ya metek, aval ete fe bi aye be'e éyeka'a ya môt ya yôb.

50 Nde, A bobajañ, jame dina m'ajô na, minsôn a metyi bi se ngul ya nyoñe ngab élik éjôé Zambe ; a na, jôm j'aboé é ne te nyoñe ngab e be jôm é ne te boé. 51 Mi lôô, m'akate nsolane jam. Sa bia bese bi aye ke ôyo, ve bia

bese bi aye veñesan, 52 été été, ntaa nkabeke dis, éyoñ ya susu'a toñ. Amu toñ j'aye jô, a miñwuan mi aye wômô, mi too te ngul ye boé, a bia bi aye veñesan. 53 Amu nyôl j'aboé nyô, j'aye jaé nyôl é ne te boé ; a na, nyôl j'awu nyô, j'aye jaé ntabane ya te wu. 54 Nde éyoñ jôm j'aboé é jaéya jôm é ne te boé, a éyoñ jôm j'awu é jaéya ntabane ya te wu, éyoñ éte mejô me ne ntiliban m'aye tôébane na,

“ Awu e minebaneya e ndañan été.”

55 A awu, ndañane wôé ô ne vé ?

A awu, nlôbane wôé ô ne vé ?

56 Nlôbane ya awu ô ne abé, a ngul ya abé é ne metiñ. 57 Ve akéva e bo'o e be Zambe, nyô a ve bia ndañan amu Nti Yésus Krist wongan. 58 Nalé ate nde, a bobajañ m'anye'e, yemane ngu, te fô'ôsan, kom ése mi bulu'u bo ésaé Nti ; mi yeme na, nju'u ésaé wônan ô nji bo zesé e be Nti.

### **Ntôkane Mimvean Mfa'a Mimfufub**

( M.M. 19 : 21, 22 ; 20 : 1-3 ; Rôm 15 : 25-27 ; 2 Kor 8 a 9)

**16** 1 Nde mfa'a ya ntôkane mimvean mfa'a mimfufub, aval a ne me nga bendé bekirke ya Galatia, mia fe bo'an aval ete. 2 Môs ya ôsu sondô ase, mô t ase ya be mia a bô'é jôm éziñ e nda jé, a naane je, abim ane mam mé m'abu'uban, nde ete ntôkane mimvean w'aye bo te boban éyoñ me soya. 3 Eyoñ me kuiya, ba bese mi a ye kañese mmbe m'aye lôm a bekalate na, be kee mveane wônan e Yérusalem ; 4 a nge d'ayiane na, ma fe me ke, wôna b'aye ke bia be be.

### **Teb Ya Dulu**

5 Nde m'aye zu jome mia éyoñ me lôteya Makédônia. 6 Eyoñ éziñ m'aye langan, nge lôte fe su'a ôyôn e be mia, nde ete mi aye li'itane ma e dulu mfa'a ôse m'aye ke. 7 Amu me nji kômbô na, me yene mia éto ji nlôtan m'alôt, amu me too ndi na, m'aye langan nté éziñ e be mia, nge Nti a kañese. Ve m'aye langan Efésus akekui Pentekôt ; 9 amu beta mbé a wu ya bo ésaé été a ñyoo ma, a bôt be ne me ngame yat be ne abui.

10 Nde, nge Timôteus a soé, tuka'a ba'alane nye mvo'é e zañe jenan ; amu a bo ésaé Nti avale fe ane ma. 11 Ajô ete, mô t a bo'o te biasé nye : ve mi li'itane nye dulu dé mvo'é, ane a ye bulan e be mia ; amu m'ayange nye e nsamba bobenañ.

12 Nde ajô Apôlos, monyañe wongan, me nga dañe ye'elane nye na, a zu jome mia baa be bobenyoñ, ve nkômbane Zambe mfa'a wé ô nji bo na a zu e be mia éyoñe ji, ve a ye zu éyoñ a yeneya mbamba éyoñ.

**Nsisli Paul A Mebatan**



13 Momba'an, teba'ane ngul e mbunan été. Bo'ane befam, bo'ane ngu. 14 Mam mese mi abo, bo'ane me a nye'an.

15 A bobējañ, mi ayeme na, nda Stéfanás é ne mbômô ébuma ya bôt be nga kôñelane minlem e Akeya, a be nga ve bebien mfa'a ya esaé ya volô mimfufub ; 16 nde ete m'aye'elane mia na, mia fe mi suu miabebien e si e be aka'a bôt ete, a e be ébe mboésaé ase, a nyô a wu nju'u esaé. 17 Nde m'avak amu nzuan Stéfanás a Fortunatus a Akaiikus be nga zu ; amu vôm mi mbe ma momo, be nga tabe e señe jenan. 18 Amu be nga volô nleme wom, a éñwônane fe ; ajô ete tuka'a kañesane aka'a bôt ete.

19 Bekirke ya Asia be sili'i mia. Akulas a Priskila, be be kirke é ne nda jab, be sili'i mia abui e be Nti. 20 Bobenyoñe bese be sili'i mia. Môt ase ya be mia a bata'ane nyô mbok a mfuban nlatane anyu.

21 Ma Paul, m'atili mebatane ma a wo wom mamien. 22 Nge môť éziñ a nji nye'e Nti, a bo'o biyo'é. Nyi wongan a za'ak ! 23 Mvam Nti Yésus Krist é bo'o e be mia. 24 Nye'ane wom ô bo'o e be mia bese e be Krist Yésus. Amen.

A faded, light blue portrait of a man with a mustache, wearing a dark suit, white shirt, and dark tie. The portrait is positioned in the lower right quadrant of the page.

Rev. Matthias MEYE  
Secrétaire Général 1961.....